

Autoridadnan ta duna Beth Twitty un oportunidad...

Carta di advertencia a bay den direccion di e mama di Natalee



ORANJESTAD (AAN): Manera ta conoci, Deepak Kalpoe cu su abogado a entrega un keho contra e mama di Natalee Holloway, Beth Twitty relaciona cu e bishita cu el haci na e lugar di trabao di Deepak Dialuna pasa. Segun e mama di Natalee pa puro casualidad e tabata eynan, y e motibo pa cual el a drenta den e internet café tabata pasobra el a mira cu e flyer cu el pega relaciona cu e desaparicion di su yiu no tabata tey mas. El a bisa cu ora cu el a drenta, el a mira Deepak trahando eyden. Loke mas ta hala nos atencion ta cu riba canalnan mericano por a mira cu tabata tin un camara scondi cu ta graba di un forma ilegal. Mescos a pasa biahá pasa ora cu Beth Twitty a bay Montaña pa parti flyersnan y a bisa cu el a bin topa cu e cas di Paulus van der Sloot. Den un conversacion cu nos

tabata tin cu autoridadnan na unda keho a worde entrega, nan a splica nos cu loke e mama a haci ta castigable ya cu el a menaza Deepak Kalpoe y el a bise cu e lo keda

pendiente pa wak kico ta bay pasa cune. Loke ta straño ta cu den e video cu e canal mericano a pasa, e voz no a bay den aire, nan a pone imagen pero sin

voz y pesey no por tende kico el a bisa e ruman Kalpoe. Autoridadnan ta bisa cu nan ta compronde e dolor di e mama y cu nan no o actua mesora contra dje. Ta bay

laga e abogado dirigi un carta pe ariba su comportacion y si esaki no yuda, e ora ey, nan lo bay actua conforme ley ta prescribi.

E hardinero lo ta presente den "Hoffi" di husticia awe??

ORANJESTAD (AAN): Awe ta dia cu e jardinero, kende ta e testigo cu a bisa cu el a wak Joran van der Sloot, Satish Kalpoe y Deepak Kalpoe na Racket Club, den oranan di marduga, riba e anochi di desaparicion di Natalee Holloway, mester presenta na corte pa duna su declaracion na huez y dilanti di e abogadonan y fiscal den e caso di Natalee Holloway. Ultimo biaha cu e mester a presenta, e no a haci esaki, mientras cu tur cos ta indica cu ningun hende sa na unda e ta. Tin diferente informacion riba e asunto aki, unda cu tin hende ta bisa cu e no kier

presenta, pa motibo cu e ta ilegal y tin miedo di worde deporta. Segun fuentenan den ramo di husticia, e testigo ta importante pa e caso, pues si e bin dilanti nan lo no deporte, mirando cu e por duna declaracionnan clave pa cu solucion di e caso aki. Tin otro fuentenan cu ta bisa cu e hardinero no kier bin dilanti, pa miedo di otro consecuencianan negativo cu por tin pa su persona si e bin dilanti. Sinembargo tin tambe indicacionnan fuerte cu e hardinero aki ya caba ta den man di Polis, cu ta tur seguridad ta protehe, te ora cu

e tin cu presenta na corte, pues awe. Den edicion di mayan, tur hende lo haya sa si e hardinero lo aparece na corte


y cu si su declaracionnan lo convence Huez, Fiscal y Ministerio Publico, pa bay detene Satish y Deepak Kalpoe un biaha mas.

Taxinan disgusta cu aumento di prijs di gasolin

ORANJESTAD (AAN): Tur cos ta indica cu taxistanan disgusta lo drenta pronto den accion pa protesta contra e aumento di gasolin cu a bolbe tuma lugar ayera. Ayeranochi, un representante di e gremio aki a tuma contacto cu mesa di redaccion y laga sa cu nan a tene un reunion caminda e topico aki a ser trata y pa mira

ki pasonan nan lo tuma pasobra nan no por mas cu e costo di bida di nos pais, caminda gasolin awor a uni na e prijs impagable di awa y coriente. Ta asina cu den transcurso di awe, e taxistanan lo por drenta den accion pa manifesta nan disgusto pa cu e caos aki cu nan ta pasando aden.


SPEED TA DIBO TAMBE!!



BEST DEAL
PARADERA

BEST SHOPPING DEAL
TURIBANA PLAZA

LAS AMERICAS
PARIBA DI BURGER KING
(Caya Grandi)



*Super Special
Prijs!*

Maletin pa School
Antes: 45,=
Awor: 25,= so!!!

Declaracion espantoso di ingenieronan di WEB

WEB ta solamente interesa den su mesun hendenan

ORANJESTAD (AAN) 'Awe pueblo lo bay compronde pakico berdaderamente prijs di awa y coriente a keda halto y por lo pronto lo sigui subi tambe', declaracion di Michael Williams.

Informacionnan cu redaccion di DIARIO a haya for di e candidato number 5 riba lista di OLA, señor Michael Williams, awe lo pone pueblo haya ril di spanto den curpa, pero loke lo bay ta mas impactante ta declaracionnan haci di parti di ingenieronan di WEB mes.

Señor Michael Williams a haya cu e momento a yega cu pueblo di Aruba mester haya sa e berdad tras di henter e asunto encuan to prijsnan barbaro pa awa y coriente cu pueblo di Aruba den su totalidad tin cu sufri pe y por lo pronto lo bay sigui sufri mas peor ainda pe.

'No ta trata aki di un campaña politico pasobra awor tin eleccion den porta, pero ta trata di informacionnan hopi impactante cu a sali for di un

seminario cu tabata tin algun luna pasa riba e dia cu e compania Aleman cu kier a bin cu proyecto di molina di biento pa Aruba, a haci su presentacion na La Cabana'.

'Manera ta conoci cu diferente gremio y tambe WEB a worde invita pa ta presente na e presentacion di e compania Aleman cu a bin cu un proyecto di molina di biento pa Aruba y cu sigur lo a bay alivia e peso grandisimo di prijs di awa y coriente riba lomba di pueblo'.

Segun señor Williams, e tempo ey su intencion y tambe di tur otro hende cu tabata envolvi den e trayectoria pa trece e proyecto aki pa Aruba, tabata pa interes general di pueblo y ta pesey tambe tur esfuerzo a worde haci pa asina tur partido, gremio y instancia envolvi logra na haya otro na mesa di negociacion.

'Ora cu bo ta negociando algo di un magnitud asina grandi na interes di pueblo, bo no ta core bay saca den publicidad desacuerdonan

entre gruponan, pero e forma con cos a bay y cu te awe a duna WEB tur oportunidad pa yega na haya otro na mesa di negociacion pa asina e pueblo en general sali beneficia, deliberadamente di parti di WEB no a worde probecha y tambe gobierno a faya mahos y cu awor na lugar cu prijs di awa y coriente a baha ta lo contrario a tuma lugar, no a keda mi nada otro cu awor mas cu nunca e berdad duro mester worde bisa na pueblo'.

'E tempo ey mi tabata campañador grandi di MEP y tur hende sa esey y unda directamente mi tabata papia cu ministernan di MEP'.

'Awe pueblo mester haya sa cu riba e dia cu ingenieronan di WEB a bin pa e presentacion di e compania Aleman unda nan a haya tur oportunidad pa haci pregunta y tambe trece nan banda di medaya of sugestionnan positivo pa interes general di pais Aruba pa dilanti, nan a haci declaracionnan cu te hasta a laga e Alemannan keda completamente

babuca'.

'Ingenieronan di WEB a bisa, despues cu nan no tabata tin argumentonan valido y di peso pa nenga e proyecto di e compania Aleman, cu tanto nan como WEB y su directiva no ta interesa pa prijs di awa y coriente baha!'

'Esaki nan a bisa relaciona cu e ponencianan cu e compania Aleman a bin cune cu prijs di awa y coriente lo por baha drasticamente y ey ta caminda cu e ingenieronan di WEB na un forma irita y arrogante a declara cu pa nan interes di nan mes, gerencia di WEB y trahadornan di WEB en general ta mas importante cu baha prijs di awa y coriente pa pueblo'.

'E tempo ey caba e Alemannan a pronostica y declara cu prijs di petroleo lo bay subi drasticamente y ta pesey e proyecto di molina di biento tabata di importancia cardinal pa pais Aruba'.

'Ingenieronan di WEB a declara cu si e proyecto enberdad lo sali beneficio mes y cu esaki lo bay pone cu

produccion di awa y coriente lo bay ta mas barata, esaki e Alemannan mester bay deal cu WEB mes y no cu ningun otro instancia pasobra nan di WEB no ta interesa pa baha prijs di awa y coriente y ta pa WEB nan ta traha y no pa pueblo'.

'Wel señores laga cada ken awe saca su som y realiza pakico prijs di awa y coriente no por a baha y por lo pronto tampoco lo baha'.

Nota di redaccion; e declaracion y informacionnan aki ta hopi comprometedor y e momento a yega cu tanto gobierno di Aruba como tambe gerencia di WEB tin cu bay duna pueblo claridad riba e asunto aki y sigur awor cu pueblo ta worde azota cu cuentanan barbaro di awa y coriente.

No por ta asina cu personal di WEB lo a haci tipo di declaracionnan asina dilanti di un grupo di hende y ta tuma un posicion estilo grupo privilegia a costo di bienestar general di pueblo y tur hende tin cu keda keto.

Caso di apelacion di parti di abogadoonan di sospechosonan den caso Natalee Holloway




>> Fiscal Majoor
mr. Karen Janssen.

ORANJESTAD(AAN): Ayera mainta na corte a tuma lugar e tantisimo caso, relaciona cu desaparicion di Natalee Holloway.

Despues cu Huez Comisario a rechaza peticion di e abogado di e sospechosonan, pa prohibi FBI haya documento y tapenan di interrogacionnan haci den e caso aki, e abogadoonan a apela e decision aki y e caso a tuma lugar ayera.

Despues cu e caso a caba, prensa a haya oportunidad di combersa cu e diferente abogadoonan den e caso aki. E prome abogado cu a sali tabata Antony Carlo, kende ta



>> Abogado mr. Oomen.

representa Joran van der Sloot.

Carlo a bisa cu di parti di su cliente el a trata dos caso di apelacion, unda cu e prome tabata trata pues dunamento di documento na FBI, unda cu huez a scucha su argumentonan y argumentonan di Procurador General.

Segun Carlo, no ta conoci ainda ki dia e decision ta cai. Pa loke ta e di dos casi di apelacion, esaki tabata trata rechazo di Huez Comisario, di e peticion di Carlo pa para e interrogacion di su cliente. Ta asina cu van der Sloot a indica cu e lo no bisa nada mas,

pues e y su abogado no ta sinti cu ta necesario pa hibe warda di polis cada vez, pa sigui hacie pregunta.

Ora cu DIARIO a puntra e abogado si ta berdad cu su cliente ta papiando, e abogado a bisa cu e no ta duna comentario y el a hala kita. Ora cu mr Oomen, kende ta representa Deepak Kalpoe a sali for di corte, e no tabata mucho interesa pa papia cu prensa, en especial prensa Mericano.

El a cuminsa cana bay, sin embargo el a contesta preguntanan di prensa local, mientras cu prensa Mericano a cuminsa frustra, pa motibo cu e no tabata bisa nada na Ingles.

Segun DIARIO esaki por tin di haber cu e echo cu Beth Twitty a bay na lugar di trabao di Deepak, cu camara y microfono scondi.

E mama a haci esaki, cu cooperacion di NBC, pues prensa Mericano. Quizas e abogado ta rabia cu prensa Mericano pa e motibo

aki, y pesey el a nenga di paia cu nan na e momento ey.


Ora cu Oomen a sali pafo, DIARIO a puntra su opinion riba e echo cu Beth Twitty a graba su cliente na su lugar di trabao.

Oomen a splica cu e keho cu su cliente a entrega contra di Beth, ta encera e echo aki tambe, cu awor ta den man di polis.

DIARIO a combersa tambe cu abogado Kock kende ta

representa Satish Kalpoe, kende a bisa cu e y su cliente no tabata di acuerdo cu rechazo di Huez Comisario y e ta spera cu Dialuna awor e lo haya un resultado positivo. Un di e aspectonan cu e ta lamenta, cu tambe ta un di e motibonan pa e no kier pa FBI haya cierto informacion, ta cu recientemente Beth Twitty a biaha pa Merca recientemente y awor e ta bin back cu hopi informacion confidencial.

Segun Kock esaki no por y pesey no ta bon pa FBI haya



>> Abogado mr. Kock.

tur documento y tape.

Segun Kock, loke Beth a haci, pues cu el a graba Deepak cu camara scondi, ta algo cu no lo por sosode na Merca.

E ta bisa cu e ta compronde si cu e mama ta desespera y ta purbando tur cos, pa e caso aki no muri.

Kock no ta pensa cu tin informacion of indicacion, manera ta sali den prensa, cu su cliente lo worde deteni atrobe, mirando cu desde dia cu e Kalpoe nan a sali, nan no a haya invitacion di polis of cualkier otro instancia legal, pa bin responde na preguntanan atrobe.

Den un entrevista exclusivi Beth Twitty ta expresa:

“Si Deepak ta inocente, di con e no ta contesta mi preguntanan?”

ORANJESTAD (AAN): Den un entrevista exclusivo cu mama di Natalee Holloway, Beth Twitty, Beth a expresa cu e ta lamenta cu durante di e un ora y mey cu e tabata na e Internet Cafe y el a haci diferente pregunta na

Deepak, esaki no a contesta ningun.

El a expresa cu e no ta compronde cu si un hende ta inocente, e no ta duna tur su cooperacion.

Si Deepak no a haci nada malo, e lo por sikiera duna su

version di kico a pasa, unda cu e por duna e mama algun tips, pa quizas yega na un solucion pa e caso aki.

Pa loko ta e keho entrega pa Deepak contra di dje, el a splica cu e no ta sinti cu el a haci nada malo.

El a bisa cu e no a intimidar ni menaza ningun hende.

Segun Beth, su accion tabata di un mama desespera pa haya sa kico a sosode cu su yiu muher.

Su intencion no tabata pa perhudica trabao di Deepak, sinembargo el a spera cu quizas Deepak por a mustre den bon direccion pa haya sa paradero di su yiu.

Pesey el a ofrece tambe e 250 mil dollar, cu ta e suma di placa pa cualkier persona cu duna un tip clave, unda cu por haya Natalee Holloway bibo



of morto.

Na final di e entrevista e mama a expresa un biaha mas gratitud na tur esnan cu ta yudando den e caso aki, pa haya sa kico a pasa cu su yiu.

El a bisa cu e ta hopi contento cu DIARIO, unda cu e sa cu tin diferente team special, cu ta investigando diferente pista pa haya sa unda Natalee Holloway ta.

Grupo di Florida specializa pa busca den santo di beach ta rumbo pa Aruba

ORANJESTAD (AAN): Un informe divulga Diarazon door di e canal WPBT-TV di West Palm Beach na Florida, ta mostra cu un Team di Buskeda di e area di Lake Park, ta rumbo pa Aruba pa yuda busca Natalee Holloway.

E Team aki di Florida, ta usa tecnicanan specializa pa busca beachnan di santo na Aruba.

Fred Golba ta e lider di e Team, y nan tin dos cacho extra specialmente entrena, esta “Astro” y “Rhino”, kendenan ta demostra habilidad increible. E Team aki ta kere, cu nan lo bay ta mas exitoso, compara cu otronan cu a fracasa den pasado.

El a bisa cu algun Beach di Aruba a worde listra, pero nan no a worde listra na e forma corecto. E Team tin hopi confianza cu nan si por localiza Natalee, si acaso e ta dera bao di santo di beach.

No ta tur cacho por detecta cadaver bao di santo di laman, pasobra e holor salo di awa ta despista cualkier animal. Pero di nan si ta spe-

cial prepara pa esey.

E Team na Florida a haya un patrocinador caba pa bin Aruba, esta un comerciante pensionado di Lake Park, esta Jim Knox.

E comerciante aki a mira suficiente potencial den e Team aki, cu el a dicidi pa cubri gasto pa nan bin Aruba y haci buskeda pa 1 siman largo.

Jim Knox a bay di acuerdo pa manda Fred Golba y su cachonan pa Aruba, debi na su experiencia global cu buskeda di cadaver, incluyendo e area di Ground Zero despues di e atakenan terorista di 11 di September 2001.

E Team di Florida a bisa, cu nan lo basa nan buskeda riba e informacion cu nan ta haya di nan mesun fuente, cu nan ta bisa ta inclui e mama di Natalee.

Jim Knox a bisa cu si acaso e Team aki logra haya Natalee, nan lo haci donacion di e placa di recompensa, pues esey no ta e asunto principal!


Abogadonan di Beth Twitty, lo entrega keho contra di Deepak, dependiendo di loko Deepak a declara na polis

ORANJESTAD (AAN): For di e abogadonan di Beth Twitty, DIARIO a compronde cu despues cu Deepak a entrega un keho contra di Beth Twitty na Polis, pa motibo cu supuestamente e sra lo a intimide y menaze na su trabao, e abogadonan di mama di Natalee kier sinta cu fiscal, pa wak kico exactamente a worde declara pa Deepak den e asunto aki, mirando cu segun Beth, na ningun momento el a menaza

of intimidar e mucha homber. Segun e abogadonan, si acaso ta asina cu Deepak un biaha mas a papia mentiranan, manera el a haci na comienzo di e caso aki tambe, Beth Holloway lo entrega un keho den su contra, pa cu esaki, mirando cu lo trata aki di un asina yama “valse aangifte”, cu ta castigable pa ley.

Den edicion di mayan DIARIO lo duna mas informacion riba esaki, si tin desaroyonan nobo.

Summer SPECIALS ta sigui!



Schaaltjie
Terra Cotta

34 cm

antes Afl. 17,50

AWOR Afl. 9,95

Idea pa
Regalo:
Kadobon
di Flora
Market

Lanterna di Colga

20 cm

antes Afl. 11,95

AWOR Afl. 7,50



Falta 8 siman pa
e Apertura di

Flora
Christmas
Market

Si, Diadomingo
Nos ta HABRI
di 10am pa 2pm

Roll Border di Palo
(Rand pa mata)
various tamanjo
cuminsando na
Afl. 19,95



Tur bo ta hanjando



8 años

Fergusonstraat 101 • Tel. 583-6468